



ОРГАН ЛЕМКОВСКОГО СОЮЗА.

Выходит в четверг около 15-того и 30-того каждого місяця.

Редакция и администрация в Крыници. — Адрес: „Лемко“ Крыница.

Пренумерата в краю:	
30 грошей	місячно,
1:50 зол.	полрочно,
3 зл.	рочно.
В Америці: 50 центов полрочно.	
1 \$	рочно.
В Чехословакии:	
2 кор.	місячно, 9 кор. полрочно,
18 кор.	рочно.

## ХРИСТОС ВОСКРЕС!

Христос воскрес! — Христос воскрес! чути всяди. Поздоровляються тьма словами люде, а радость вилуку видно на их лицах. Бо и якже не тішитися — коли тоты свята обходиме на памятку воскресеня Спасителя світа. Як не тішитися — коли з тьма святами воскресеня Христоваго — воскресат и будится до нового жытя ціла природа. Будятся рослины — и земля траву прозябає, будятся з зимового сна звіры — вертают з теплых краев птахы, оживляються и набирают свіжих сил до нового труда люде. Тому дороги нам тоты свята, веселы и радостны. Веселы они, особенно того року на Лемках, бо Лемкы в том року также ожили — и набирают новых сил. Здобыты права школьны — отдільне епископство для Лемковины — переведене организации на Лемках и основане Лемковского Союза, котрый выдає свою газету „Лемко“ то сут тоты достыженя остатнього року, котры вливают в иаш народ новы соки и побуждают нас до новово жытя.

Тоты три річы не дают Украинцям спати. Каждый з тых трьох фактов бє в Украину, як гром з ясного неба. Серед украинцев, як сами повідают: „вчинилась метушня“. Шмарилися по селах егомосці и панове учительове. З початку потішал єден другого: „це не може бути“. Наибольшу „метушню вчннила“ номинация О. Нагорянского, як гварят украинці „кацапа“.

Знаме о том, што аж до остатньої хвилі пробовали егомосці ратувати Украину на Лемках и ужывали до того прерижных штук. На О. Нагорянского доносили и клеветали перед властями, подсували своих кандидатов, годилися аж и на „восточный обряд“ лем бо-дай был украинец. З того видно, о што им ишло ци о віру, ци о Украину. Словом — робили так — як робит все Украина — откаль ся на світ зродила. — Не помогло. Днеска справа уж рішена.

Будеме мати свого руского духовного Пастыря. Як то мило звучыт?! „Свого руского“ — бо ци могли мы назвати епископа Коцылов-

ского своим?! Кир Йосафат ригал на нас словами злобы и ненависти при всякой случайности, и можеме сміло речи. же епископ Коцыловский и его несчестный дорадник о. Качмар через тую безпощадну и заілу борбу з нами довели нас до одорваня от Перемышля. Мы им днеска вдячны. Отдохнеме от них. Бог допомог нам до победы а при нас и ціла Галицка Русь скріпила свои силы и духа. З добромильского и Леского повітов пишут до нас масово — штобы старатися освободити и их от тыранских рук своего владыкы и прилучити до епископства лемковского.

Корчытятся отже Украина и мечутся зо злости украинці, котры, видячы... же гратят на Лемках грунт под ногами, начынают воювати против нас своима. знаныма нам аргументами Сут то тоты самы аргументы, якыма воювали против нас пред войном и в часі світовой войны. — Они сами — платны агенты Австрии и Берліна — привыкшы. брати от кого лем можна и дастся. не можут поняти того, же не вшыткы так робят и же сут ишы люде, котры щыро хотят помочи своему народу. Тоты то украинці кричали пред войном, же мы береме пінязі от России, они своима злобныма доносами довели до того, же тысячы наших людей померло по криминалах и на придорожных вербах, они то свідчыли против нас ложно пред австрийскыма судами и кричали „распи — распни!“ и они то и тепер мечутся и начынают чернити, же тоты вшыткы, што ся робит, то робота за грошы. Лем ишы не порозумілися меже собом, откаль тоты грошы, бо одны кричат же то большевицкы, а другы, же польскы, але они внет и што до того дойдут до згоды. Факт, же грошы береме, бо „Лемка“ розвозитися в сяночком повіті автами.

Але як не помогли вам громы и проклятыя на вшыткы, што руске — метаны до недавна през вашого владыку и его дорадников, так само не спасут Украины на Лемках и пробы очерняня. Наши люде уж нераз чули таке от украинцев и знают отрижнити правду от ложи.

Союзы в Чехословакии, Югославии, Бельгии, Голяндии, Германии, Франции и других краях. Недавно чытали мы в газетах, што в Софии, головном місті Болгарии отбылося величаве собранє 100.000 делегатов Аграрного Союза. В том собраню взяли участ найвышшы достойники державны, вшыткы министры и сам король и королева. Можна собі пред-

**Вшыткы кореспонденцию прошу присылати на адрес до Крыници — бо там перенесена администрация и редакция газеты.**

ставити силу и повагу такого собраня, силу тых сто тысяч людей, загорненных в хлопскы гуні. Зрозуміле, же з таким представительством стану хлопского вшыткы мусят рахуватися. относиться до такого представительства з належным уваженьом, и ухвалы и жаданя их мусят быти выконаны. Представитель того Аграрного Союза має першый голос в державі і з ним рахуються вшыткы.

Нич дивного, же хлопы в Болгарии представляют силу і выбороли собі права.

Таку саму силу, такы самы права хтілбы выбороти для наших людей основаный на зізді в Горлицях, дня 15-го марта 1934 р. „ЛЕМКОВКЫЙ СОЮЗ“. Тот Союз єст союзом чысто хлопским, котрый буде старатися zorganizувати наших лемков. — буде дбати все о того, штобы выбороти для них права, так просвітительны, як и господарчы. За зобраны грошы з членских взносов має Лемковский Союз закупувати и выдавати книжки господарскы, для наших чытален, уряджувати лекции господарско-просвітительны по наших селах, — закупувати машыны господарскы и ліпшы сорты зерна на засівы, устроювати господарскы курсы и т. и. Одним словом буде дбати о того, штобы поднести нашы сельскы господарства и сотворити для газды ліпшы условия жытя. Як видите з того, єст тот Лемковский Союз — чысто хлопским Союзом и длятого вшыткы хлопы повинни вписатися до того Союза.

Лемковский Союз має свои статуты. — На тых статутах можна закладати по селах отділення (кружки), котры подчыняються головному управленю Лемковского Союза в Горлицях.

Отділенє в якомси селі можна основати, коли найдєся найменше 10 людей — котры хотят вписатися до Лемковского Союза. — Отділення по селах будут доставати даром — книжечкы о господарском приспособленю. Як замысламе урядити господарске приспособленя, о том написано в тойже газеті на стор. 2.

Але так, як судьба, газеты „Лемко“ таксамо и судьба Лемковского Союза лежыт цільковито в руках хлопов. В Болгарии рахуються з хлопом, бо там сут они вшыткы органи-

## Сто тысяч делегатов хлопских на собраню в столиці.

Сто тысяч хлопов поіхало до столиці, але не у нас и не наших лемков — але в Болгарии. Давно уж zorganizувалися рольники в других державах и оснужвали аграрны (хлопскы)



зованы — и вшитки належат до „Аграрного Союва“. — У нас будеме также представляти велику силу лем втотчас — коли вшитки лемки запишемся до того нашого „Лемковского Союва“. — Отже Братя, бертеся до роботи и закладайте по селах одділення той нашой хлопской організації!

### Американску силу и богатство будувал наш хлоп емигрант.

Соединены Штаты Америки потребуют 10 миллионов рольных фермеров.

От якогоси часу зауважаме, же в газетах американских пишут о том, штобы отворити Америку для иммиграции европейской.

Газеты тоты подають, же силу и богатство Америки сотворили иммигранты, котры в першом и другом поколію дали Америці армию найліпших работников.

Наплыв емиграции — пишут американскы газеты, упал; днеська, веце людей выїзджат з Америки. як до ней приїзджат. Малы чысла иммиграційны — признаны европейским краям не сут выкористаны, бо люде сами не хотят до Америки іхати. — Єст то злый знак для Америки.

Край тот збудували не автохтоны, але тоты люде. котры мали одвагу поїхати за океан и осісти в незнамом краю серед незнанных людей.

И тоты и перша и друга генерация тых иммигрантов, а не розпещена пята ци шеста побудовали силу Соединеных Штатов.

Газеты американскы наричут дальше, же Соединены Штаты забыли о тых заслугах иммигрантов и повіли: „Мы не хочеме вас ту, — або лем барз мало“. На тоты отповіли Европейці. „А мы дякуеме — нам незалежит на выїзді до Америки“.

Дальше пишут тоты газеты, же если такой стан потырват дальше, то Америка згыне —

удусится власныма долярами, котрых никто не зможе проісти и умре з нужды серед богатства. Уратувати нас може лем приплыв новых людей, а тых потребуе дораз Америка 10 миллионов, а дакус познійше ищы 50 миллионов.

Дакотры мыслят, же приплыв людей обнижыт заробкы. Тымчасом — неправда — бо як в Америці было давно лем 4 миллионы людей, то в том часі механик зарабял там 1 \$ денно, — а пред войном, коли было 123 миллионы — килько они зарабяли?

Найважнійше для Америки єст тот, же Америка має вшиткого больше, як люде потребуют, и длятого Америка потребуе людей — яко консументов.

Акциом газет американских заинтересувалися шыроky кругы американского Общества и сам президент Русвелт и належыт сподіватися, же в недалеком часі выйде новеля до теперешнього закона о иммиграции.

Буде ходити найперше о иммиграцию рольничу, штобы заселити — великы ищы незаселены терены новы, а также и тоты, котры оставили люде, глядаючы по містах лекшого жытя і заробку.

В таком случает былибы браны в рахубу найперше народы славянскы. бо тоты народы маюот найбільше способностей рольного заселенства. Добром репутацией в том взляді тишатыся в Соединеных Штатах Полякы и лемкы. И тоты може отворити для наших людей ворота Америки — и дати им заробок.

### Рольниче подготовленє.

В задачах „Лемковского Союва“ товариства для рольников лемков — меже другыма рішено поправити и поднести наши господарства и побольшати доходы з тых господарств през закладаня по селах т. зв. Подготовленя рольничого.

**До газеты долучаме ЧЕКЫ.**

**Просиме присылати**

**пренумерату.**

Праві вшиткы мы жыеме з рольництва. Жыеме планно не лем для того, же єст кризис, але и длятого, жене вытягаме з нашого поля, лук и пасовиск тилько землеплодов — килько можна вытягнути.

А дієся тото длятого, же не маме потребного просвіщеня рольничого, т. зиачыт, не знаме газдувати. Найтяжшый и найпильнійшый труд нашого газды без фаховых відомостей не може дати добрых результатов. Дають тоты фаховы відомости рольничы школы, але не вшиткы можут кончыти такы школы, бо наука коштуе — а при том тот котрый выїхал до школы — не все має кого дома лишыти, а преця господарства не можна оставити без дозору. Длятого то Лемковский Союз хоче помочи нашим газдам таким способом, же буде стреміти до завязуваня по селах кружков приготовленя рольничого, — котры маюот учыти господарства практично, а имено.

Молодеж одного села, так хлопці як и дівчата, переважно в віку от 15—20 літ завязуют кружок Приготовленя рольничого и лучатся в групы от 6 до 10 лиц. Така група достає роботу до переведеня підприємства з господарства хлопского або жіночого, нпр. управу груль, поправу лук, заведење садов — яринных огородов — розплоджыня кур, свиней, увец, телят и т. д. Темат до работы можут собі в селі сами выбрати. Одна група веде лем одну роботу але каждый сам — бо розходится о того кто зробит свою роботу найліпше и кто осягне найліпшы результаты.



Хочу Вам дещо сказати о мистецтві взагалі — а о мистецтві на Україні — в щегульносці — Мистецтво то є слово чисто українське — оно не зрозуміле якому-небудь хаборови. Щоби цее слово капувати — треба культурного осьвідомлення. — А це каждому не доступно. Мистецтво — давніше казалы наши „штука“ — це значить — труднощи — хто небудь не потрафит штуці. Даймонато — гроші днесь роздобути, це штука не абияка — або найти українського писаку, котрий би знав — письменницьку мову — або цей то штука — коли би якій українській часопись мав 500 (пятьсот) платних пренумераторів. — Але менша — важне тее — що штука — або мистецтво — єсть вічне. Як казав. Тиберій Горобець — римській філзоф — „Віта бревис — арс льонга“ — це по нашому значить „Живіт короткий а штука довга“. До мистців зачисляемо, малярів, музикантів, акторів, віршописів та інших комедіантів. В кожній

ділянці осібна штука. Маємо чимало мистців — але всі они за границями України — бо україни як знаєте ще нема а має бути у майбутнім. — Всі нашы малярі є в чужих краях — и малюють всьо — тилькі не українські мотиви — малюють приміром всякы ляншафты, всякы Біркен ам вальдесранде, голі бабі, та всяке інше — а тилькі ніц українського. І длятого треба сказати — що в наших тижневниках и мистецьких журналах всі графікі та ілюстрації — выглядають як муриньскы та індіанскы примітивы. — І до цього часу — хоча скількі є малярів і ще більше умерло — ніхто не зілюстрував нашой славной історії. Як треба було намальовати портрет Мазепи не було кому. — Но і шо тут почати? — Осередок нашой історії, підстава історична самостійности, — підтримка нашой ідеї — а чорт зна як выглядав. Жажлива ситуація. — Але ми не такі — щоби собі не порадиити. Запросили маляря а цей на підставі джерел і ріжних там музейних малюнків намалював файный портрет, шо всім подобався. — Я думаю шо Самому Мазепі сподобавсяб — хоча би сам себе не пізнав, але картина є файна і кінець!

Як би не Москаль Репін, то би з нас ніхто не знав як козакі — запорожці справді выглядали. — Але файно намалював! Хоча і Москаль. — Але тут треба припускати шо цей Репін — мав трошкі української крови в тилах — бо інакше не міг би намальовати щось подібного — Москаль — варварник? Хабар? Власне наши вчені історикі бадають цю справу.

Друга діланка мистецтва себто штуці — є литература а по нашому письменницьтво. Оно у нас поділено на три доби: Староукраїнську, романтичну и новітну. Староукраїнської, властиво не ма, бо шо було то москалі забрала — а віддати не віддадут — бо кажут шо це іхня. — Шо тичится романтичної — то також чимало загинуло — але щось ше зістало, можна все в кішени а в найгіршім

випадку в торбі сховати. — Але шо є — то найцінніші твори. — Напримір послушайте: Сонце гріє, вітер віє, серце мліє. Гамаліє, — Шо ся діє, шо ся діє. — Той не оре, цей не сіє. Чи не хоче, чи не вміє. Но і такє то меціє!

Поезія як видите є глибока — хоча і трошка перестаріла; бо вже кількадесят літ пережила — але ліпшого нема ніц то треба і це шанувати. Так само як козацькі — чуби і всю козацьку славу, татари, бісурмани — турецькі кайдани и всі іншы балагани — треба шанувати, бо оцим ми всі вегетуємо а не булоб того — не булоб ніц. Є, правда — молоді поети — та шож? дідько іх розуміти-ме — як они сами себе нерозуміют.

Ми є народ дуже культурний, хоча ми від сходу мешкаємо, але наша культура є західна. Тилькі це дуже неприємно — шо ніхто нашою мовою не говорить — я маю на думці письменницьку мову. За виїмком кількох віршомазів та редакторів — мало хто більш балакає так як напримір пише Новий Час — або іншій Громадський Голос. А це оно дієся тому — у нас є мало культурних слів — а туткі треба свою думку передати на папір а слів на це не має. Але від чого редакторы та професорі. — Іноді выковают — такє слово шо аж сміх збирає — і даймонато як би Шевченко того слово почув — не знаю шо булоб тоді. Але шож можно призвичаїтись до усього.

Цего року сподіємо ся, шо Тиктор дістане нагороду Нобля за свою Велику Історію України. — Бо то не маєте понятя, килько треба талану и праці вложити в таку історію. Бо щоби ця історія була написана, на підставі історичних джерел і документів — то ще палъ шесьць!

Але туткі інша оправа. Туткі треба було, всьо видобути з фантазії — по нашому по просту — збрехати — а це є штука. — На другій раз напишу о українськїм спорті та руханці. — Поважання

Луць-Пуць.



Робота єст потом контролювана а тоты, котры зробили ю найліпше достають нагороду. Крім того пред каждым роботом достають группы потребны книжки до науки, з той отрасли, котру выбрали для себе. Таким способом в продолженю килькох місяцев наша молодіж, сходячы ся разом трудячыся — читаючы и учачыся набере фаховых відомостей у себе дома — и здобуде практично-просвіту рольничу так, якбы ходил до школы рольничой.

Так училися господарувати другы народы и таку школу практичну вводится у нас в остатних часах.

Кошты веденя работы конкурсовой поносят самы участники, але тоты кошты при управі рослин сут невеликы, а при розплоджуваню звірят оплачаються — бо такы телята, куры, свині для расплода мають высшу ціну.

Выдаєся отже недуже, а зыск єст великий, бо робится на своим полю — поправятся свою луку и допроваджатся до побольшыня доходов з власного господарства. Єслибы нашы села заинтересувалися тым — прошу зголошуватися по близшы информации до редакции газеты „Лемко“.

**Поміщайте оголошєня в газеті „Лемко“.**  
Хто хєе прислужытися нашой газеті нехай зберат оголошєня з міст и сел повітов Лєско, Сянок, Кросно, Ясло, Горлиці и Новый Санч.



**Єгомосьць:** Ти Ваню бувби дуже файний чоловік, колиб став українцем!

**Ваньо:** Та вы єгомосьць ищы бысте мудрійшы были, если бысте сой припомнули, жєсте руснак — як ваш отец был

## Што робити на яр

(Написал Андрей Ванца з Розділя).

Шмар зо себе то гунчыско  
Спряч з загана то куписко  
Вывез купу из кавалка  
Завез скаля до потока.

Спряч каміня — выбер терня  
На том місци посій зерна  
Оброб землю як найліпше  
Будеш мати хліба бильше.

Заваль ямы — спряч каміня  
Бо велика в тя родина  
Нехай земля не дармує  
Каждый істи потребує.

Вычыст стайню, вычеш статок  
Посмотр также на твой садок  
А як не маш, то барз пильнуй  
Сад деревка, таж ся змилуй!

Групку, яблин, ци то сливку  
Под берегом посад липку  
Пхай до землі, што лем можеш  
Бо тым собі барз поможеш.

О як брыдко, о як стыдно  
Ніт деревка, нич не видно  
Твои діти як сироты  
Лізут всяди в чужы плоты.

Смотрит, лізе як бідачка  
Сут яблочка у нонашка  
Бо нонашко рано встає  
Щепит дичкы, в землю пхає.

Пильнуй брате — Сад закладай  
И того сой в легці не май  
Бо ты посмотр, як на Чехах  
Там ніт вербы при дорогах.

Там яблока, самы шкипці  
А в нас знищат зараз хлопці  
О як буде у каждого  
Он не пиде до чужого

Не леж брате, так не треба  
Не впаде ти само з неба.

Андрей Ванца.

## Чудо.

Сут на Божом світі чуда  
Але люде то не знают  
Же Бог може дати чудо  
Коли люде то вартають.

Ходят люде до церковці  
И моляться, бют поклоны  
Обсыпаны церкви златом  
Идут на то миллионы.

Але чуда не видати,  
Хоц и руки в гору зносят  
Хоц и пісню вескресєня  
Світу дзвоны розголосят

Але чудо тото буде  
И будеме братя знати  
Лем ся треба всім зберати  
В „Лемко — Союз“ вписувати.

И каждый ся розвеселит  
Нова в жылах кров заграє  
Бо там в горах Березина  
Уж гитару давно має

Пасє уці и обдертый  
Волочытєся по Карпатах  
И заграє на гитарі  
Але потом, аж по святах,

Українцям также буде  
Таке собі „шыє — порє“  
Ни порядку, ни користи  
А лем бідным ниткам горе.

Сядє учар на могилі  
Сядє з гитарою  
Поговорит тихесєнько  
Брате мой з тобою

И настрою я гитару  
И наберу кус охоты  
Дам вам братя легку кару  
Лем три злоты.

То за „Лемка“ треба дати  
Як хочете вшытко внати  
За то Лемко даст роботу  
И до жытєя всім охоту.

Написал Ваньо Березина,  
Королик пол.

## ШТО ЧУТИ В СВІТІ.

**Важне для наших сел!** Люде скаржатся, же нашы Рады громадскы не припильновали справы при закладаню общых громад. Десяткы наших сел прилучено до польских громад. 14 наших сел давного повіта грибовского, котры тепер належат до Н. Санча не отворили своєй общой громады, хоц село Фльоринка надаєся добрі на центр. — Вшыткому винен брак организации и зрозуміня народных интересов. Але ищы час и можна робити просьбы и рекурсы до воеводства.

**Горлиці.** Общество „Русска Бурса“ в Горлицях достало позволенє от властей на демонстрация по лемковских селах научных, сельско-господарских, кооперативных пропагандовых фильмов, маючих на ціли культурне и экономичне поднесенє нашего села.

Того рода фильмы высвітлено в днях от 18. до 24. лютого в селах: Климковка, Усте, Руске, Ганчова, Высова, Блехнарка Ропкы и Квятонь, а в найблизшом часі выїдєся з тыма фильмами и до других сел. Як люде заинтересувалися тыма фильмами,

найліпше доказує нам факт, же на такый фильм пришло в Климковці 167. в Ганчовой 187, в Высовой 92, в Блехнарці 72. в Ропках 149, в Устю Русском 119, в Квятони 85 людей.

Програма во вшыткых селах складалася з таких картин: Для дітей „Робинзон Крузое“ — „Гуливер серед Лилипутов и Великанов“ и „Зоологичный сад“ (звірята и птахы). Для старших: Война газова, управа землі, розвитє кооперации от основаня кооперации през Рочдельских ткачей до тепер. Жытєя и страсти Исуса Христа, годовля дробю и иншы. При конці все высвітлялося веселу комедію.

Фильмы относячыся до кооперации и сельского господарства были объяснены и попереджены рефератом. — Населенє тых сел де высвітляно фильмы велике — а самы рефераты и лекции при помочи фильму мусит уважатися за мысль дуже счєсливу и користну, особенно если возмєся под увагу факт, же доходы идут на поширенє „Русской Бурсы“ в Горлицях.

Старшым подобалися найліпше картины з жытєя Исуса Христа. На фильмах было много таких людей, котры ищы николи в жытєю фильмовых картин не виділи. Всяди просили приїзджати частійше, особенно з рухомыма фильмами, котры подобалися селянам найбольшє

Доступны ціны от 5—20 гр., (для бідных дітей и старших даром) ладна ціль, бо на нашу Бурсу способствовали тому, же народ был рад з того и всяди просили заглянути до них незадолго.

На сеансах присутствовала также місцева интеллигенция, котра, а особенно учительство — ишла на встрічу, помагала в роботі и причынилася до полного успіха.

**Горлицы.** Дня 3. марта 1934. Правленє Русской Бурсы в Горлицях выслало привітственну телеграму новоименованому епископу для Лемковины о. Дру Нагорянскому.

Дня 6. марта с. г. в Горлицях, в домі Русской Бурсы отбылося собранє делегатов руского населєня горлицкого повіта, на котре явились представителі громад, кооператив и читачен. Присутствующы ршили одноголосно выслати благодарственне писмо Его Еминенции Папскому Нунциу в Варшаві, за его содійство и помоч в назначеню руского епископа для Лемковины, поздравительне писмо новоименованому епископу о. Дру Нагорянскому, вконці выбрано делегацию, котра на руки Старосты повітового горлицкого зложила благодарєня Правительству за прихыльнє наставленєся до справы креованя нового епископства для Лемковины и выслали благодарственну телеграму Господину Министру Перацкому.

**Смерековец повіт Горлицы.** Дня 4. марта отбылося в читальні им. Качковского во власной салі представленє пєсы „ТАЛЕРГОФ“ В. Р. Ваврыка. — Представленє отограла члены театрального кружка читальні им. Качковского из Сквиртного.

Акторы сквиртнянской читальні отограла свои ролі барз добрі, а головно отзначылися Андрей и Павел Юрковский, Войтович, Дуда и Тыма. Видно, же вправна рука режисера управителя школы в Сквиртном Ник. Сильв. Юрковского приготвила их до той ролі.

Вшыткым відомо, што єст Талергов, але коли люде смотріли на поедынчы образы на сцені, як там в том страшном Талергофі мучыли наших людей як они страдали за свой народ, свою віру, як их там багнетами кололи, як их тысячы на тыфус там гынуло, як украинскы посіпаки на кладбищах рубали, то не было никого, жебы мог слезы встримати, и не плакати над страшном дольом наших народных мучеников.

Чєст и велика вдячност Сквиртнянам за то, же загостили до Смерековця и оживили читальню, бо як раз тота штука надаєся барз добрі на великий пост.

Людей было дост, але аж барз дуже не было. Приїхало много видных гостей з сусідных сел а головно из Гладышова. Може было бы и веце людей зо Смерековца, але же ся тото не барз подобало „єгомосьцьови“ Шевчукови, та не оголосил в церкви, як то належало зробити, лем повіл же якаси „академия“ приходит зо Сквиртного до Смерековця, и же ліпше было бы отложыти тото на по святах.



Отче Шевчук, ци Вы знате же Талергоф то было пекло и чыстилице для наших людей на том світі — и не ест ліпшого часу на думаня о Талергофі як в великом пості. бо Талергоф то символъ терпіня и мук наших людей за віру и народност, бо там з причини украинскых доносов наши люде невинно гынули без сповіды и християнского похорону, тоты бідненькы деревяны кресты на могилах мучеников украинскы посіпаки казали топорами зрубувати.

Та уж ліпше „егомосць“ пильнуйте не сквиртнянскою „академією“ але своєю домашною „академією“ жебы ся ночами неволочыла сяди-тади, жебы не ходила з чужыма женами на коротшы дороги през Магуру, бо фурман неборак ся не мог дочекати, та их мусіл лишыти, лем сой думал, чом тота ваша „академія“ сидит так долго з чужом женом в кряках, и смотте, жебы тоту другу вашу „академію“ не мусіли в Квятоии другый раз палицьовати.

А вы Смерековяне тримайте ся своєю чытальні, лем веце працуйте, жебысте сами могли давати представленья, бо мате на то барз красну салю.

**Завадка Рымановска.** В році 1931 основано у нас Чытальню им. М. Качковскаго, котра містилася в громадской салі. Люде — члены чытальні, сходятся часто до чытальні и тото так заболіло нашего священника О. Михайлу Жеплинського, же почал кричати на проповідях в церкві, же до чытальні ходят лем самы комунисты и они недостойны ходити до церкві. Егомосць, хоц сам дост веселый и любит нераз на обітах, котры у нас люде справяют по случаю отправы в церкві и Службы Божой за душами — заспівати и веселы пісні в роді: „Гей гоп Грицю, не лапай за сподницю“ не поздержуеся от напасти на честных людей, котры сходятся до чытальні, штобы порадитися меже собом, и прочытати газету, або книжку. Наибольше нападат на секретара чытальні Г-на М. Барну и грозит му, же выжне го з церковного хору. Особенно грызся и кусал зо злости, коли члены чытальні почали будувати свой власный дом. В тотчас публично в церкві называл членов чытальні безчестниками, смаркачами и начал присягати, же до пятох роков в Польщі не буде ани одного Руснака, лем самы Украинці, або Полякы. а Руснакы, котры зас будуют чытальні, тоты подвалины под Талергоф, пидут до чортовой матери. — В своих громах, якы валит на членов чытальні, называт раз тоту чытальню польском. другый раз комунистичном — але завадчапе робят свое, тихо без крику ходят дальше до чытальні, бо знают, же тепер треба им ити о власных силах. Давнійше — мали дорадника в своем священнику — а тепер, штож дае нам тот священник, одно проклятя, и шырене ненависти и незгоды. Але не бойтеся Егомосць о нас, помимо вашой присягы мы претримаеме дальше як пят літ, але ци вы от нас не пидете перше там, десте нас посылали — увидиме.

**Злоцке,** А у нас зас новина и то не хоц яка. И не хоц кто нам ю повіл, але сам ксьондз Качмар, и то не хоц-де, але в церкві. И не от хоц кого чул тоту новину, але от самого епископа Коцьоловскаго, бо был в Перемышлю и там то довідался, же новый епископ для лемков, то не епископ, але лем якийси сотрудник (вікарий) епископа Коцьоловскаго. Тот новый епископ (таку новину принес нам О. Качмар) был у епископа Коцьоловскаго звідатися, ци му позволит приіхати уж на лемкы. Барз гарді си побесідували — бо то порядный человек.

Розповіли ту люде, же я и други украинскы священники пидеме з лемков — але ні — Я буду дальше разом з вами працувал. Жыйме в згоді — свою чытальню (Качковскаго) пренесте до нашой (Просвіты) будеме разом заедно робити. Правда, як гарді тепер бесідуе — правда — кус ктоси бреше, бо О. Нагорянский достал декрет з Апостольской Столиці на самостоятельного администратора лемковины и ест зависимый лем от Риму, так як и каждый епископ, — але поза тым барз красна бесіда. Шкода, лем, же кус О. Качмар припизнился з ньом, бо може ліпше бы было выповісти тоту в тотчас, як наши люде свя-

тили в Злоцком памят погыбшых в Талергоф, або и в тотчас, як открывалося чытальню им. М. Качковскаго, то не былобы того вшыткого, што ест тепер.

Але памятае О. Качмар, як вы тогда бесідували — як летіли громы на нас, яко на схизматиков, безвірков, большевиков и т. д. А памятае, же в той заілой ненависти до вшыткого, што руске цомагал вам ревно другый подобный вам апостол християнской любви — О. Голинский фамелиянт епископа Коцьоловскаго?

А памятае, як сте по том вшытком волочыли наших людей по судах. Деж то в тотчас поділася згода? — Мы згоды хцеме, але шырой, правдивой и познаме все волка в овечьей скорі, тому зас потрафиме все повісти; „Вара от нашой учарні“ — бо мы знаме, як бы там газдувал.

**Ванивка.** От громады Ванивка достала Редакция письмо котре поміщаме без змін:

П. Т. Редакция „Лемко“ — Новый Санч. В цершом чысьлі „Лемка“ в дописи: Што каждый Леммо мусит знати о собі на стор 2. Ест и наше село Ванивка зачыслене до Украинскых. Просиме Редакцию „Лемка“ откликати и подати вшыткым до відома, як можна, то на першой стороні так:

Село Ванивка ест до того часу и все буде чысто рускым, а не украинскым як подають Украинці в своем отчеті о украинизации Лемковины.

Видно з того, же то непрошены опікуны пхаються до нас и пуцают небылицы о нашем селі, жебы таким способом хоц на хвилю потужыти Украину на Лемках. — *Ванивчане.*

От себе Редакция додае шго ей самой сут добрі знаны рускы переконаня Ванивчан — а подала нотатку о украинизации того села за украинскыма газетами лем для того, штобы наших людей освідомити, же Украинці не цофаються и перед неправдом, если того вымагают их интересы.

**Важне для секретарей громадских.** При громадах, якы тепер творят може быти секретарьом лем такый, котрый мае уконченный курс для секретарей. — В Кракові на таком курсі, урядженом для секретарей воеводства Краковского было около 400 участников, але наших лемков не было. Вину того поносят войтове, котры не оголосили о таком курсі.

Довідуемеса, же отбудеса другый курс для такых, котры сут тепер секретарями громад.

Треба, штобы наши секретары приняли участ в тых курсах, бо инакше не моглибы они быти секретарями новых общых громад.

### Жалі лемковскаго дзядя.

Послушайте дзядя з Лемковины люде:  
Часы такы тяжкы, як то жыти буде,  
Мушуся реку вам кус поскаржыти,  
Як тяжко жыти.

Бо што раз тяжше на світі настае  
Люде штораз скупшы, никто нич не дае,  
Хоц бы дідусь нераз — вета — гылтнул  
[дашто]

Ба — та не є за што.

Деси каждому „злоцюшков“ бракуе  
Каждый лем вшытко на векслі купус,  
Порткы, загорткы, хусткы и шаликы  
Вшытко на вексликы.

Де ся давны часы о мой Боже діли,  
Што то собі дзяды поіли, попили.  
Яксме даде вошли нераз до корчмиска  
Фурчали торбиска.

Давнійше были ліпшы и отпусты.  
Бо дзяд з них вертал округлый и тлустый,  
Тай закурил собі цигар алиганский  
Кусцьок по паньскы.

Ой не было то, як старинны часы,  
Што купил за шустку пол метра колбасы,  
За пят грайцаров „моцной“ кватерочок,  
Жыл тогда дзядочок.

А днес, што раз куртшы дзядовскы доходы,  
Як бабскы кабаты, теперешной моды,  
Часто пару грошей през ден не назбераш  
И на вечер вмераш.

А як з вельком бідом кусися назберам,  
То штобысте знали, штося напризерам,  
Не лем напризерам, але и наслухам,  
Же аж пухнут уха.

Таж на каждом кроку безбожност ся діе,  
Оден на другого без пардону вріе,  
Ой буде вам люде барз даколи тепло,  
Бо пидете в пекло.

С—ин.

### До чого веде злоба?!

Члены чытальні им. М. Качковскаго побудовали в р. 1933 р. свой власный чытальняный дом. Тот дом не подобался дакотрым нашим приятелям и они громили и металися на чытальняков.

В послідну минуту достаеме з Завадки дуже печальну новину, а именно в ночи з 14. на 15. марта якаси вража рука подложыла огонь под тот чытальняный дом, котрый цілый згоріл. — Видно, комуси был он на заваді, коли го подпалил. Тот бандыта думал, што з домом згорит и наш рускый дух, але он помылился бо чытальнякы знают, кому тот дом был сольом воку. Они знают тых приятелей, котры не повздержатся, аж и от знищыня народного добра, лем бодай на своем поставити. Але то не шкодит, а наоборот помагат, бо люде переконуются до чого способны дакотры тоты опікуны, котры так много кричат о роботі для народа.

Так и в Завадці, Члены чытальні постановили выбудувати новый дом, але уже каменный, штобы его не можна было так легко подпалити. Видно з того, же тото несчастья не ослабило, ани не убило руского духа, а наоборот загірло честных чытальняков до нового подвига.

Счесть им Боже!

### КРЫНИЧАНЕ!

Купуйте товары в КООПЕРАТИВІ

„ПРОГРЕС“

в дому Фатулы

под етациейм желізнодорожном.

Складайте Ваши ошадности

в КОМУНАЛЬНОЙ

Касі Ошадности

в Крыниці.

Она дае полну гваранцию,  
платит добрый процент —  
и выплачат зараз выповіджены грошы.

Уділят она также  
пожычок на невысокий процент.